

LLETRES NUEVES

L'amigu Xunu

Paez llobu con gafura y fiereza
dientro de les llendes de la finca, La Llosa,
pero asemeya a «Platero» del poeta d'Huelva.
Ye noble, intelixente y vieyu amigu,
qu'amoria pola ausencia del dueñu.

Perru fiel qu'espera sollerte con noxu
la llegada seronda del amu.

Esconsoña, allevántase del so abellu,
llambe la manu d'un besu
qu'entra metanes les rexes de la portiella.

Déxase afalagar cola manu d'amor con bon ciñu
esti collaciú queríu del alma
ximelgando'l rau de contino,
espurre'l so cuerpu como'l d'una llóndriga,
abriendo la so boca prieta,
amosa'l dentame, escolingándo-y la llingua;
atentu espoxiga les oreyes
a una palabra, a un xestu, a una sensación.

Xunu tien por nome proféticu d'un dios,
atiende con güeyos arteros
a la voz gasayosa del amu.

Allegre, nerviosu, lladra percontentu,
cuerre'l pastor empobinándose haza'l verde prau
d'esplendor de primavera,
a la gueta d'aire con llibertá.

XUACU VALDÉS

Sones

*Xiblando filos d'aire,
la gaita dexa sones albentestate
nel fondu de la mariñana rasera,
au'l músicu colos güeyos zarraos,
suañando pa concentrase na pieza.*

*Al debalu'l ruxir del roncón
come de la borrina y da lluz
dibuxando furacos nel airón
na triste tarde de la seronda mariella.*

*De la marraza de los deos del gaiteru
xurden les notes del punteru.
Alienda'l fuele la gaita
metiendo y sacando l'aire
que-y entra pela sopladera,
valtiando pa dientro y pa fuera
el vieyu pelleyu d'oveya.*

*Cai la tarde, llega la nueche del olvidu,
acallen los sones gayoleros
que tocaba'l gaiteru na campera;
queden los oyíos murnios y con rocea
al nun sentir los besos musicales
na cara escura, orpinada y sola.*

XUACU VALDÉS

Suéñame, amor

Suéñame.
Suéñame ya goza agora
del amor,
del amor intenso.
Lléime sin esfuerzu
nesti instante de deseos.
Lléime las palabras grabadas nel miou corazón.
Suéñame, amor.
Suéñame ya inventa una historia
onde'l destín nos l.lieve por un sendeiru
de felicidadá.
Aparta las espinas ya las piedras.
Esveira los toxos ya los artos.
Amor,
andaremos el camín l.limpiu de maleza
ya
escribiremos nel corazón los momentos nuevos.
Estúdame, amor.
Memorízame.
Archiva'l miou querer nel tou corazón,
nesti instante de deseos.

M^a ESTHER GARCÍA LÓPEZ

Glaiós

*La lluna encesa
camudó'l color
un fríu nel cuerpu
llamó-y l'atención.*

*Al pie de la casa
esluca una güela
sentá nuna esquina
faciendo un xergón.*

*Corriendo hai muyeres
paisanos y vieyes
buscando axelaos
una dirección.*

*Al pie de la casa
xúntase la xente
la güela qu'escucha
palidez d'horror.*

*Xugaben les neñes
a la oriella'l ríu
cayó una d'elles
ya naide la vio.*

*A los pocos meses
d'aquella desgracia
sonaron campanes
la güela morrió.*

*Cada seis de marzu
corones y flores
inunden les agües
del ríu Nalón.*

JAIME ÁLVAREZ GONZÁLEZ